

Faulo ena leta vemagilafuna Timoti 'inaya

Leta ana alamani weaqina

Faulo ena leta vemagilafuna ba'e Timoti 'inaya 'wayavia 'abaga agona Loma 'inega tuta~nana vanue 'ebeyoqona 'inaya toatoa. Faulo ge taha luveifana daviaqi ta 'esi Ieisu Valena ana lulugaihi 'inega vanue 'ebeyoqona 'inaya ia'uluguyea. Timoti lova tauna Faulo 'inega Ieisu Valena noqolia ta vetumaqanea, 'inega vetoiula Faulo 'inaya. Ta 'abibodanaya Faulo Timoti a'uya 'abaga Efeso 'inaya to'ekalesia na'itamakidi. Ba'e leta~nana 'inaya Faulo Timoti vonea vonigo tauna kavona Yaubada ena tovedavi taha. Ta wese vematamagilafuyea tomtau edi ilivu weaqina tuta 'ebeluo'ova 'inaya. Ta Faulo nuanuana Timoti Yaubada ena vona me ena giwalifatu tuta qabuna nalugaihiea, tuta aqiaqina 'idia ta wese tuta vitana 'idia. Ta 'eguma vita nalobea tovegwavu'ai 'idiega tua ta nalugaihidi edi luveifana weaqina. Faulo Timoti givewaiwaiea 'inega wese navewaiwai Ieisu ana vetumaqana weaqina. Ta wese vematamagilafuyea nuanuana namai navayausia Loma 'inaya.

Leta gamona

- 1:1-2 Vematamagilafu be venoqi
- 1:3-18 Faulo ena vona iula Timoti 'inaya
- 2:1-26 Toluavia aqiaqi Keliso weaqina
- 3:1-9 Tomtau edi ilivu be edi viaqa tuta 'ebeluo'ova 'inaya
- 3:10-4:8 Vebibina tafwalolo ana fewa weaqina
- 4:6-18 Faulo ena toa weaqina givesimalalia
- 4:19-22 Lukaiwa be vona veyoluba

Lukaiwa

1 ¹⁻² Natugu Timoti ye, ba'e eu leta ya'a Faulo 'iguyega. Ya'a Yaubada ena nuanua 'inega yavetoaletuyana Ieisu Keliso weaqina. 'Inega Yaubada vetunegu sabi lugaihi Ieisu Valena weaqina, mana Yaubada

^a 1:1-2 Via 16:1; 1Tim 1:2

ni'a vona fofofolea ita'a Ieisu 'inega toa aqiaqina kana lobe. Nuanuagu Tamada Yaubada ta eda Kaiwabu Ieisu Keliso edi veyoluba ta wese edi nuakolokolo 'inega me eu nuadaumwala una toa.

Vona iula Timoti sabi givewaiwaina

^{3b} Timoti, tuta qabuna 'aubena ta wese velovelovana 'idia me egu lukaiwa yavevenoqi Yaubada 'inaya weaqiu. Lova tubugwavo ivetofewa Yaubada 'inaya, ta ya'a wese ba'itagana egu nuanua vunavunaqina 'inega yavevetofewa Yaubada~nana 'inaya. ⁴ Yanuaia lova tuta~nana magilafuda katoatoa me eu dou yanogeu. Ta nuanuagu qiduana ena 'ita 'evivieu 'inega ena qaiawa. ^{5c} Yanuave'avinia o'a eda Kaiwabu uvetumaqanea inau Iunisi ta wese tubuhu Loise edi vetumaqana 'idewana. 'Inega yahalamani aqiaqiea eu vetumaqana waiwaina 'eno'eno. ^{6d} Lova nimagu yaha'uya 'iuya 'inega Niboana Gwalagwalana ena wila'a neiu eu fewa weaqina. 'Inega wila'a~nana una givewaiwai 'eviviea kavona 'aiwe una mu'e saelia. ^{7e} Mana Yaubada ge taha niboana 'ebemwaniniva daneida, ta 'esi Niboana Gwalagwalana neida, ta ba'e Niboani~nana 'inega kana vewaiwai be tomotau kana veyolubedi ta wese ada fata taudega kana 'itamakida.

⁸ Waiwai~nana neiu, 'inega ge una iniyauyau eda Kaiwabu Valena ana simana weaqina, ta 'esi tuta qabuna una lulugaihiea. Ya'a ia'uluguyegu vanue 'ebeyoqona 'inaya Keliso Valena weaqina, ta weaigu ge una iniyauyau. O'a wese vita taha taha una lobedi 'idewani ya'a, ta Yaubada ena waiwaiega una tovoloi'ita. ^{9f} Yaubada~nana 'etoyavuida ta venua'ivineda toa vunavunaqina weaqina. Vonahaqiaqi, gebu ita'a eda aqiaqi 'inega davenua'ivineda, ta 'esi tauna ena nuenuega madugabeda ta 'abiboda kuyavata qabudi ena vonega i'ifoqe. Ba'e yani~nana viaqia mana nuanuana nave'iteda ena nuakolokolo qiduana Ieisu Keliso 'inega. ^{10g} Ta ba'itagana ena nuanua ni'a give'ifoqeyea ada To'etoyavua Ieisu Keliso ena mai 'inega. Tauna 'aliga ena waiwai luveawalia, ta Vale Aqiaqina 'inega yawai vataya ana 'eda givesimatalia 'idaya.

^{11h} Yaubada ena nuenuega venua'ivinegu Vale Aqiaqina weaqina. 'Inega Vale~nana weaqina yavetovaletuyana be, yavetolugaihi ta wese yavetove'ita. ¹² Ta ba'e weaqina vanue 'ebeyoqona 'inaya yatoatoa ta vita yalulutonovia. Ta gebu eda iniyauyau Vale~nana weaqina, mana egu vetumaqana 'iuna Ieisu yahalamani aqiaqiea. Ta wese yahalamania tauna ana fata egu fewa lova neigu na'itamaki aqiaqiea ana laba na'evivi namai ena 'aubena qiduana 'inaya. ¹³ Egu ve'ita lova yaneiu una kafi'i'ihia ta una vetutumei ta 'inega tomotau una ve'itedi. Ta ge una nuafania tuta qabuna

^b 1:3 Via 23:1 ^c 1:5 Via 16:1 ^d 1:6 1Tim 4:14 ^e 1:7 Lom 8:15 ^f 1:9 Efe 2:8-9; Tai 3:5
^g 1:10 Ibe 2:14 ^h 1:11 1Tim 2:7

me eu vetumaqana be me eu veyoluba una toatoa, mana o'a Ieisu Keliso maega. ¹⁴i Eda vetumaqana 'inega Niboana Gwalagwalana 'idaya toatoa. Ta tauna ena iula 'inega ana fata eu fewa lova Yaubada neiu una 'itamaki aqiaqiea. ¹⁵Ni'au ualamaniana di'we Eisia ana tovetumaqanayavo qabudi inogegu, ta qabu~dina 'idiega 'oloto magilafudi Faigelusi be Elimogini wese inogegu.

¹⁶Ta yavevenoqi eda Kaiwabu 'inaya Onesifolo me ena gadeavo nanuakolokoloyedi, mana tauna tuta qabuna vavayausigu ta ena vona 'inega givewaiwaiegu. Tauna ge taha tuta dainiyauiyau egu toa vanue 'ebeyoqona 'inaya weaqina. ¹⁷Tuta~nana mai ba'idia 'abaga Loma 'inaya 'inega weaqigu sali dadana ana laba lobegu. ¹⁸'Inega yavevenoqi eda Kaiwabu 'inaya ena 'aubena qiduana 'inaya 'oloto~nana nanuakolokoloyea qiduana. Mana ni'a ualamani aqiaqiea ena fewa 'ena'ina weaqigu 'abaga Efeso 'inaya.

Ieisu Keliso ena toluavia aqiaqina

2 ¹Natugu Timoti ye, o'a Ieisu Keliso maega, 'inega ena nuakolokoloyega una vewaiwai. ²Egu ve'ita yani qabudi weaqidi tomotau qabudi matadia ni'a unoqolidi. Ta ve'ita diavona una neidi taudi ka'awahaqiaqiedi ta wese ma adi vetumaqana 'idia, be 'inega adi fata ve'ita~nana wese ina ve'ita ukamanea mali tomotau 'idia.

³j Ta ita'a tovetumaqana kavona Ieisu Keliso ena toluavia. 'Inega tuta~nana vita kana lobedi kana tovoloi'ita me eda bibitaqo kavona taha tovedavi aqiaqina. ⁴Vonahaqiaqi, o'a Ieisu Keliso ena toluavia, 'inega ge una awafeleu bwa'obwa'o ana ilivu 'idia, mana ilivu diavona nuau ina 'ewea, 'inega ge au fata eu tovmatana una giveqaiawei. ⁵k Taha wese 'ebvetalatutula yaneineiu: 'Eguma tolaha taha nuanuana nanugweta, e 'inega luaqiaqiea be laha ana luvine qabudi na'abiboda aqiaqiedi. Mana 'eguma gebu 'inega ge wese ana fata ve'ia namanamalina nalobei. ⁶l Wese 'idewani tovaqoqa, mana tauna luaqiaqiea be ena gwavubiga 'inega bolimana 'abwagana namadugudatonovia, ta 'abiboda enavo ina gudatonovia. ⁷Egu vonayavo una nuaidi, mana eda Kaiwabu tauna ana fata yani qabudi weaqidi nuau nagiq'uuya.

⁸m Ieisu Keliso una nuave'avinia, tauna kini Deibida ena gadeyega vi'oi, ta 'aligega ya'itoto 'evivi. E ba'e Vale~nana Aqiaqina yalulugaihiea. ⁹n Ta Vale~nana ana lugaihi weaqina vita yalobea 'inega iyoqonigu kavona ya'a toluveifana taha. Ta 'esi Yaubada ena vona gebu ana fata ina yoqoni. ¹⁰'Inega me egu bibitaqo yahawafelegu vita qabuna 'idia Yaubada ena tomotau venenua'ivinidi weaqidi, be yaqisa adi fata 'etoyavua ina lobea

ⁱ 1:14 1Tim 6:20 ^j 2:3 2Tim 1:8 ^k 2:5 2Tim 4:8 ^l 2:6 1Kol 9:7 ^m 2:8 1Kol 15:4; Lom 1:3 ⁿ 2:9 Efe 3:1,13; Fil 1:12-14

Ieisu Keliso 'inega. Ta 'etoyavua~nana 'inega tuta qabuna Yaubada maega ina toatoa ena di'we simasimatala vatayana gamonaya.

11^o Vona ba'e ana fata be kana vetumaqanea:

'Eguma Ieisu maega kana 'aliga,
e 'inega tauna maega wese kana toa.

12^p 'Eguma vita kalobelobedi
ta kana bibitaqoda vita diavona 'idiega,
e 'inega Ieisu maega kana luvine.

Ta 'eguma ita'a Ieisu kana vegeqea,
e 'inega tauna wese navegeqeda.

13^q Ta 'eguma ita'a
Ieisu kana vegwavu'aiea,
e 'inega ge wese nanogeda,
mana tauna ge ana fata
ena vona fofofola naqeunidi.

Yaubada ena tofewa aqiaqidi

14^r Yani qabuna Keliso weaqina ni'a yave'iteu nuanuagu eu to'ekalesia qabudi 'idia tuta qabuna una simana 'evi'eviviea. Ta Yaubada ana wawega una awatayededi be yaqisa ge vaina vona weaqidi ina ve'ae'aetoga, mana ve'ae'aetoga~nana ge taha yani aqiaqina 'inega na'ifoqe be tomotau naiuledi, ta 'esi tovineneqa qabudi nagiveluveifedi. 15^s 'Inega wese una vetafe'wa waiwai Vale Aqiaqina ana ve'ita aqiaqi weaqina. Ta ge una iniyauyau eu fewa weaqina, ta 'esi me eu gwavubiga Yaubada ena vona aqiaqina una givesimatala aqiaqiea, 'inega Yaubada na'awahaqiaqieu. 16^t Ta ge una lugu toveqae kavokavovo adi qabu 'idia, mana edi vona 'idiega ve'ae'aetoga 'ifo'ifoqe tomotau nuanidia ta Yaubada ena nuanua ivevenuafania. 17^u Ta toveqae~dina edi ve'ita kavona bonu 'idewana. Nugweta bonu goyona ta 'abiboda naveqidua ta na'uluma, 'inega tomotau visiqa qiduana ina lutonovia. Ta 'oloto magilafudi adi wawa Aiminio ta Filitasi edi ve'ita omo'e 'idewani. 18^v Mana ve'ita aqiaqina ana 'eda ni'a inogea ta edi lugaihi 'inaya ivonaya, "To'aliga edi ya'itoto 'evivi ana tuta aqiaqi ni'a 'ifoqe." Ta taudi edi u'ava 'inega vaina tomotau edi vetumaqana Ieisu 'inaya igivedawalilia.

19^v Ta Yaubada ena vonahaqiaqi ana avutugu falafalana 'waya'wayavina 'eno'eno vonaya, "Eda Kaiwabu alamani aqiaqiedi tomeqabu ena tomtauyavo." Ta wese vonaya, "Tomeqabu eda Kaiwabu 'inaya iawafeledi e luaqiaqiedi be edi ilivu luveifadi ina nogedi."

20^v Vonahaqiaqi, vanue taha aqiaqina gamonaya kulufa qabudi i'eno'eno 'idewani gaeba be 'ulena. Vaina kulufa goulda be siliba 'inega iviaqidi,

^o 2:11 2Kol 4:11 ^p 2:12 Md 10:33 ^q 2:13 Lom 3:3-4; Tai 1:2 ^r 2:14 1Tim 6:4; Tai 3:9

^s 2:15 1Tim 4:6 ^t 2:16 1Tim 4:7 ^u 2:17 1Tim 1:20 ^v 2:19 Naba 16:5; Ion 10:14; 1Kol 8:3

ta vaina 'aiwe be bwa'obwa'o 'inega iviaqidi. Vaina sagali ana tuta weaqina, ta wese vaina 'aubena kavokavovo weaqina. ²¹Idewani wese tomotau, 'eguma taha toga ena ilivu luveifadi nanogedi ta taunega nagivevunavunaqia, e 'inega tauna kavona taha kulufa aqiaqina ta ena kaiwabu ana fata navefewea ena fewa aqiaqina weaqina.

²² Timoti, o'a kilakaiu, ta kilakai ilivuna 'wafi ena qaiawa weaqina ge una viaqi. Ta 'esi luaqiaqieu be yani taha taha ana fata ina givewaiwaieu e ba'e yani diavona una viaqidi. 'Inega vetumaqana be veyoluba ta wese toadaumwala ilivu diavona una 'abibodedi. Ta tuta qabuna tomotau aqiaqidi maega ona toatoa, 'idewani taudi eda Kaiwabu Iesu giwalidi vunavunaqina 'inega ivevenoqiea iula weaqina.

²³ Ta wese yavona 'evivieu, veqae kavokavovo be vona ge 'ebeiu la una nogedi, mana ni'a ualamaniana vona diavona 'idiega ve'ae'aetoga be ve'ala'alamaqi'ai i'ifo'ifoqe. ²⁴Yaubada ena tofewayavo ge ina ve'ala'alamaqi'ai, ta 'esi tomotau qabudi ina nuakolokoloyedi. Ta luaqiaqiedi be Yaubada ena vona tomotau ina ve'ita aqiaqiedi, ta wese luaqiaqiedi be tomotau edi ilivu weaqina ina bibitaqodi. ²⁵Ta Yaubada ena tofewayavo luaqiaqiedi be aqabu Yaubada ena vona ivegeqea ilivu nuvana 'inega ina ve'itedi. 'Inega ana fata Yaubada tovegeqea diavona giwalidi nagivilei ta ena vona aqiaqina ina vetumaqanea. ²⁶'Inega nuadi na'eqa'u ya ta Seitani ena si'wa 'inega ina dena. Mana lova ena si'wa 'inega yoqoyoqonidi itoatoa ta ena nuanua iviaviaqidi.

Tuta 'ebelu'ovoa weaqina

3 ¹Nuanuagu una alamaniana tuta 'ebelu'ovoa 'inaya vita taha taha ina 'ifoqe. ²Mana tuta~nana 'inaya tomotau taudiega weaqidi ina nuanua, ta mane ana nuanua nuadi na'ewea. Ta wese nuavane 'avadi be, gagasa 'avadi be, awagila 'avadi be, gogama inadiavo be tamadiavo edi vona ge ina matayagedi be, tomotau iula ina lobedi ta ge ina lukaiwa iula~nana weaqina, ta wese ge taha yani gwalagwalana ina 'amayabei. ³Ge taha veyoluba kana 'itei 'idia, ta wese ge nuanuadi tomotau ina nuataqodi, ta 'esi tomotau ina awawebuiedi be tomotau ina vunuqidi. Ge taha yani aqiaqina weaqina ina nuanua, ta taudiega ge adi fata be ilivu luveifana nage sitonova ina nogedi. ⁴Ta wese tuta 'ebelu'ovoa 'inaya tomotau ediavo ina suluvedi be, taudiega ilivu luveifana qabuna 'idia ina awafeledi be, me edi gagasa taudiega ina givaneyedi. Ta ge Yaubada weaqina ina nuanua, ta 'esi taudimo edi qaiawa weaqina ina nuanua. ⁵ Tomotau diavona kana 'itedi adi 'ita kavona totafwalolo, ta Yaubada ena waiwai ivegeqea. 'Inega Timoti nuanuagu una toasi'i 'idiega ta ge taha tola'ai una viaqi taudi maega.

^w 2:22 1Tim 6:11 ^x 2:23 1Tim 4:7 ^y 3:1 1Tim 4:1 ^z 3:5 Md 7:15,21; Tai 1:16

⁶Ba'e tomotau diavona ilugulugu vanue taha taha 'idia, ta vivine edi vetumaqana dawalilina ivavayausidi sabi 'eu'au'avadi. Ta vivine~dina me edi 'wamomo itoatoa, mana edi ilivu luveifana ana vita ilulutonovia, ta wese edi nuanua luveifadi 'idiega itauya kavokavovo. Ta tolugu diavona edi veaqila 'inega vivine diavona nuadi i'ewea. ⁷Ba'e vivine~dina ve'ita vauvaudi tuta qabuna i'abi'abibodedi, 'inega ge ana fata nuadi na'eqa'ui Yaubada ena vonahaqiaqi weaqina. ⁸^a Vonahaqiaqi, toveaqila~dina ve'ita aqiaqina iveaviea 'idewani lova 'oloto magilafudi me Itifita adi wawa Ianisi be Iamibilisi Mosese iveaviea. Toveaqila~dina adi 'ita kavona tovetumaqana, ta edi vetumaqana ge tunutunuqina ta wese nuadi nawale ge da'eqa'uya. ⁹Ta edi ve'ita luveifana ge adi fata be tuta kuena 'inaya ina ve'itaye, mana nawale tove'ita luveifadi qabudi Yaubada nagive'ifoqeyedi vunavunaqaya, 'idewani lova 'ifoqe Ianisi be Iamibilisi 'idia.

Faulo simana 'ifoqeyea tola'ai lova 'ifoqe 'inaya

¹⁰Ta o'a yawaigu ni'a ualamani aqiaqiea, 'idewani egu ve'ita be, egu ilivu be, egu nuanua qiduana be, egu vetumaqana be, egu bibitaqo be, egu veyoluba ta wese egu 'alataya ni'a ualamanania. ¹¹^b Ta wese visiq a be tomotau edi vevoalana 'iguya ni'a ualamanidi. Ba'e vita diavona yalobedi 'abaga Anitioki be Ikoniame be Lisitila 'idia, ta 'idiega Yaubada 'etoyavuigu. ¹²^c Vonahaqiaqi, 'eguma taha toga Iesu Keliso maega itoatoa, ta nuanuana Yaubada ena 'eda na'abibodea, e 'inega tauna wese visiq a be vevoalana nalobedi. ¹³Ta tomotau luveifadi be wese tove'ita 'eu'au'avididi edi luveifayavo nave'ena'i. Taudi tomotau ina u'avedi, ta wese taudiega ina u'avedi.

Vebibina Timoti 'inaya Yaubada ena vona weaqina

¹⁴Ta o'a ve'ita tunutunuqina ni'a u'ewedi ta ualahalamanania ve'ita diavona vonahaqiaqi. 'Inega una kafi'i'ihidi, mana ima'a au tove'itayavo ni'au ualamani aqiaqiema. ¹⁵O'a eu tuta gwama 'inega be ana laba ba'itagana Buki Nugwenugweina ena vonayavo ualamani aqiaqiedi. Buki~nana 'inega alamani aqiaqi otaqina ni'a u'ewea, ta 'inega 'etoyavua ni'a ulobea eu vetumaqana Iesu Keliso 'inega. ¹⁶^d Vonahaqiaqi, Buki Gwalagwalana ena vona qabudi Yaubada ena nuanua 'inega i'ifoqe. Vona diavona 'idiega ve'ita tunutunuqina kana 'ewea, 'inega vonahaqiaqi kana alamanania. Ta vona diavona 'idiega ada fata kana alamanania tola'ai aqiaqina be tola'ai luveifana. Ta wese vona diavona adi fata be nuada ina luqa'uya 'inega eda luveifana kana alamanidi. Ta wese vona diavona adi fata ilivu tunutunuqina ana 'eda ina ve'iteda, be yaqisa yani aqiaqidi kana

^a 3:8 'Ifo 7:11 ^b 3:11 Via 13:14-52; 14:5,8-20 ^c 3:12 Md 16:24; Ion 15:20; Via 14:22

^d 3:16 Lom 15:4

viaqidi. ¹⁷Ba'e 'inega Yaubada nuanuana ena tomotauyavo na'iva'ava'ata aqiaqieda, be 'inega ada fata ena fewa aqiaqidi kana viaqidi.

Yaubada ena vona ana lugaihi weaqina

4 ¹Nawale Iesu Keliso ena 'evivi mai 'inaya tomotau 'ali'aligidi ta wese mayawaidi ina tovolu 'iawanaya ta naluvinedi. Tauna maimai naluvineda kavona Kini. 'Inega Yaubada be Iesu Keliso matadia yavematamagilafuyeu, ²Yaubada ena vona una lugaihiea! Tuta qabuna una lulugaihi, tuta vitana 'idia ta wese tuta 'ebeqaiawa 'idia. Ta vona diavona 'idiega tomotau una givetunuqidi be una lugwaeyedi ta wese una vona iuledi. Ba'e yani diavona una ve'ita aqiaqiedi me eu bibitaqo. ³^e Mana tuta maimai 'idia tomotau ge nuanuadi ve'ita aqiaqina ina noqoli, ta 'esi taudi edi nuanuayavo ina 'abibodedi. 'Inega taudiega edi tove'itayavo ina salidi, mana tove'ita diavona tomotau edi nuanua 'inega ina lugaihi 'idia, e 'inega lugaihi~nana ina noqolia ta ina 'awahaqiaqiea. ⁴Tomotau diavona ve'ita tunutunuqina ina nogei, ta 'esi nuanuadi qiduana tubudiavo edi velulu'uyayavo ina noqolidi be ina 'abibodedi. ⁵Ta o'a tuta qabuna eu nuanua simasimatalinega una toatoa. 'Eguma vita una lobeia tomotau 'idiega Iesu weaqina 'inega ge una lua'u fewa tauna weaqina, ta 'esi una tovolu'i'ita. Ta luaqiaqieu be una vetafe'wa waiwai Iesu Valena weaqina. Yaubada eu fewa neiu, 'inega fewa~nana una lu'ovoia.

⁶^f Vonahaqiaqi, o'a una fewa Keliso weaqina, ta ya'a egu 'aubena ni'a vadi'wedi'wea be bwa'obwa'o ba'e ena nogea. 'Inega yawaigu ni'a yavegubayea Yaubada 'inaya. ⁷^g Lova Yaubada egu fewa neigu ta ba'e fewa~nana ni'a yalu'ovoia. Keliso Valena weaqina yavetoluavia ta vita taha taha yavewaiwai va'inedi. Ta egu vetumaqana Iesu 'inaya ge eda nogei, ta 'esi yakafi'i'ihia. ⁸^h Ya'a ni'a yavetunutunuqa Yaubada matanaya, 'inega ilivu tunutunuqina ana ve'ia 'iva'ava'aina nawale ena 'ewea eda Kaiwabu ena 'aubena 'inaya. Tauna Toluvine tunutunuqina, 'inega ge agu 'aidegamo ve'ia naneigu, ta 'esi tomotau qabudi iba'eba'e ena 'ifoqe mai weaqina wese ve'ia~nana ina lobeia.

Vematamagilafu Timoti 'inaya

⁹Timoti, nuanuagu qiduana una lukwayavoni una mai, ¹⁰ⁱ mana Dimasi ni'a be'u bwa'obwa'o ilivuna 'inaya ta nogegu tauya Tesalonaika 'inaya. Ta wese agu toiulayavo magilafudi ni'a inogegu, mana Keleseni tauya di'we Galetia 'inaya, ta wese Taitusi tauya di'we Dalemata 'inaya. ¹¹Ta Luke namo maega atoatoa. 'Inega eu mai 'inaya Maki una 'ebe'ewei

^e 4:3 1Tim 4:1 ^f 4:6 Fil 2:17 ^g 4:7 1Tim 6:12 ^h 4:8 1Kol 9:24-25 ⁱ 4:10-11 2Kol 8:23; Kol 4:14

ona mai, mana tauna toiula aqiaqina egu fewa 'inaya. ¹²Ta Tikiosi ni'a yavetunei tauya Efeso 'inaya. ^{13j} Ta eu mai~nana 'inaya agu kwakwalufai una 'ewei una miea. Kwakwalufai~nana lova yaha'uya iagu Kalifo ena vanuea 'abaga Tiloasi 'inaya. Ta wese nuanuagu egu bukiavo una miedi, ta yani 'ena'ina egu 'wayaviavo yubai 'wafidi 'inaya ge una venuafanidi.

^{14k} Taha 'oloto kainumu ana tovefewa ana wawa Alekisana lova vita qiduana neigu. 'Inega nawale Yaubada nave'iea ena viaqa veifana weaqina. ¹⁵Ita'a Yaubada Valena kalulugaihiea, ta ba'e 'oloto~nana Vale~nana vevoalanea, 'inega tauna weaqina una 'itamaki aqiaqieu.

¹⁶ Agu vekotu nugwenugweina 'inaya toluvine matadia ge taha toga daiulegu, ta 'esi tauguyega yavata'ita'iegu, mana tomotau qabudi imwaniniva 'inega inogegu. Ta ge nuanuagu Yaubada vita 'inega nave'iedi edi noga weaqina. ¹⁷Ta 'esi kotu~nana 'inaya eda Kaiwabu ana 'aidega iulegu ta givewaiwaiegu, be yaqisa Iesu Valena ana fata yalugaihiea taudi ge me Diu 'idia. Tauna 'etoyavuigu yubai laioni manimaninidi 'awadiega. ¹⁸Ta wese na'etoyavuigu toluveifana qabudi 'idiega, 'inega me egu aqiaqi na'ebe'ewegu naluguyegu ena 'Ebeluvine mahala 'inaya. Luaqiaqieda be eda Kaiwabu kana awatuboya tuta vataya 'inaya. Vonahaqiaqi, eda nuanua 'idewani!

Lukafoi

^{19l} Egu lukaiwa yavetunea Filisila ma moqanedi Akwila 'idia, be wese Onesifolo me ena gadeavo 'idia. ^{20m} Elasitasi nawale 'abaga Kolinita 'inaya toatoa. Ta Tilofimo yanogea 'abaga Milito 'inaya, mana vevihia. ²¹ Ta egu nuanua 'ena'ina una lukwayavoni una mai ta 'abiboda ibwalo'o ana tuta nave'ale. Edavo Ebulusi be, Fudenesi be, Linusi be novuda Kalodi ta wese tovetumaqana qabudi edi lukaiwa ivetunei waiwai 'iuya.

²² Nuanuagu eda Kaiwabu niboaniu maega ina ve'aidega. Yaubada ena veyoluba qabumi 'imia.

^j 4:13 Via 20:6 ^k 4:14 Ais 59:18; Lom 2:6 ^l 4:19 Via 18:2; 2Tim 1:16-17

^m 4:20 Via 19:22; 20:4; Lom 16:23